

starogradski

OPĆINA STARI GRAD  
SARAJEVO



MUNICIPALITY OF STARI  
GRAD SARAJEVO

# haber

BESPLATAN PRIMJERAK • SEPTEMBAR, 2021, broj 51.



**Zajednički projekat:  
Dariva - Kozija ćuprija**

- 6-7 Saradnja sa SFF-om
- 8-9 Bratimljenja : Čair i Aerodrom
- 11 Pomoć Srebrenici
- 13-16 Infrastruktura
- 19 Aleja ambasadora
- 20-21 Karate klub "Baščaršija"



## Impressum

- Izdavač:** Općina Stari Grad Sarajevo
- Pripremili:** Almedina Porča  
Alma Imamović  
Jasenko Jašarević  
Nedim Šahović
- DTP:** Safet Mališević
- Fotografije:** Safet Mališević  
Nedim Šahović  
Haris Karamehmedović
- Štampa:** Inelex d.o.o.
- Tiraž:** 3000
- Adresa:** Zelenih beretki br. 4  
71000 Sarajevo
- web:** [www.starigrad.ba](http://www.starigrad.ba)
- e-mail:** [info@starigrad.ba](mailto:info@starigrad.ba)
- Telefon:** +387 33 282 491



## Projekti

# Milionski projekat

## Rekonstrukcija vodovodne

Radovi se izvode u dijelu ulice Veliki Alifakovac i ulicama Alifakovac, Maguda i



Općinski načelnik sa saradnicima i predstavnici firme Mibral

**S**redinom septembra počeo je veliki projekat rekonstrukcije kanalizacione i vodovodne mreže sa asfaltiranjem u dijelu ulice Veliki Alifakovac i ulicama Alifakovac, Maguda i Megara. Vrijednost ovog značajnog projekta je 1.444.800 KM.

Projekat uključuje zamjenu kanalizacione mreže u ukupnoj dužini kišnog kanala od 446 metara, fekalnog kanala 488 metara, 34 nova šahta, oko 130 novih priključaka (kišnih i fekalnih), te devet rešetki za prihvatanje kišnih voda sa saobraćajnice. Po pitanju vodovodne mreže, umjesto dva cjevovoda izvest će se jedan profila DN 300 dužine 430 metara, a pored ovog rekonstruisat će se i dio cjevovoda profila DN 100 (20 metara). Realizacijom ovog projekta će se poboljšati funkcionalnost, olakšati eksploatacija i što je najbitnije, smanjiti se gubici vode na ovom području. Po završetku svih radova, trasa će se asfaltirati.

## Hadžibajrić i Bralović-Smith potpisali ugovor o izvođenju radova

Ovim radovima prethodilo je potpisivanje ugovora sa odabranim izvođačem radova. Ugovor su potpisali općinski načelnik mr Ibrahim Hadžibajrić i direktorica firme Mibral d.o.o. Maja Bralović-Smith. "Ovdje se radi o projektu vrijednom 1,4 miliona maraka, a 50-60% tih sredstva finansirat ćemo iz budžeta Općine Stari Grad. Uključila se i Vlada FBiH i Ministarstvo komunalne privrede, infrastrukture, prostornog uređenja, građenja i zaštite okoliša sredstvima od vodnih naknada koje pripadaju Općini Stari Grad. Radi se o veoma starim instalacijama za koje vjerujem da se nisu mijenjale posljednjih 70 godina," izjavio je načelnik Hadžibajrić prilikom potpisivanja.

Radovi su počeli sa lokacije kod Inat kuće, a odvijat će se u fazama. „Radovi

# na Alifakovcu: i kanalizacione mreže kroz naselje

Megara ● Projekat košta 1,4 miliona konvertibilnih maraka ● Rok za završetak radova 100 dana

## Postojeća mreža preopterećena

Postojeća kanalizaciona mreža u dijelu ulice Veliki Alifakovac je tehnički neispravno izvedena, dok u ulicama Alifakovac, Maguda i Megara nema položene kanalizacione mreže odgovarajućeg kapaciteta i kvaliteta. Mreža je za vrijeme padavina opterećena većim količinama vode iz potoka, kao i mješovitim otpadnim vodama pa dolazi do kvarova i izljevanja. Što se tiče vodovodne mreže, postojeće instalacije su veoma loše i često dolazi do pucanja. Sve ovo stvara velike probleme stanovnicima pomenutih ulica, a usljed čestih kvarova potpuno je uništen i asfalt na ulicama.



Zamjena vodovodne mreže, oborinske i fekalne kanalizacije

će se odvijati u četiri faze, prva faza je od Inat kuće do raskrsnice iza pekare Alifakovac, druga faza je od pekare Alifakovac do raskrsnice sa Franjevačkom ulicom, treća faza je od Franjevačke ulice do Magude, četvrta od Magude do kraja. Prvo se radi rekonstrukcija separate kanalizacione mreže, a zatim rekonstrukcija vodovodne mreže“, pojasnio je voditeljje gradilišta Dženan Alijagić.

## Gradani zadovoljni jer se rješava dugogodišnji problem

Razgovarali smo i sa građanima ovog naselja. Dijana Simit Burzić koja je rođena na mjesnom području Babića bašče, ispričala nam je kako imaju višedecenijski problem.

„Mi smo imali kontinuirano mješanje oborinske i kanalizacione mreže, a ovim projektom to će se riješiti. Saobraćajnica koja za naše mjesno područje predstavlja žilu kućavicu biće sanirana, jer će pored oborinske i fekalne mreže biti sanirane i vodovodne ci-

jevi, a na kraju će se staviti i novi sloj asfalta, što će doprinijeti kvaliteti života,“ kazala je i dodala:” Ja bih prije svega da se zahvalim načelniku i njegovim nadležnim službama zato što su prepoznali problem koji kod nas tinja već nekoliko decenija, a vrhunac je dobio po završetku rata. Ovo što je načelnik Hadžibajrić uradio za ova četiri mandata do tog momenta ni jedan načelnik nije uradio ni pola, tako da to sve govori. Načelnik i službe općine prate Zborove građana, i prate ono što je građanima zapravo važno“, izjavila je Simit Burzić.

Sličnog mišljenja je i Emina Čolić koja živi u ulici Alifakovac 14., te kaže da će ovaj projekt građanima donijeti normalizaciju života.

„Godinama smo se patili, fekalije su ulazile u stambene objekte. Jedva čekamo da se projekat završi, da normalno živimo da imamo normalne uslove u 21 vijeku. Načelnik Hadžibajrić je već dobio Plaketu desetljeća, a sad poslije ovog projekta treba mu dati Plaketu stoljeća. Ja govorim ne samo u svoje ime nego ime velikog broja stanovnika“, kazala je Emina.

Rok za završetak svih radova je 100 dana.



Simit Burzić: Rješavanje velikog problema



Emina Čolić: Godinama smo se patili

## Priča s naslovne strane



# Općina Stari Grad i Grad Sarajevo zajedno saniraju put od Darive do Kozije ćuprije

**Na dionici od Bentbaše do Kozije ćuprije do sada uloženo oko 400.000 KM ● Projekat koji je javno dobro, od koristi za građane i turiste ● Sanacija dionice duge 1.600 metara**

Općinski načelnik mr Ibrahim Hadžibajrić i gradonačelnica Sarajeva Benjamina Karić potpisali su sporazum o saradnji na zajedničkom projektu sanacije lokalne saobraćajnice od Darive do Kozije ćuprije. Kompletna dionica dužine oko 1.600 metara bit će potpuno sanirana, a radovi su već počeli. Projekat je vrijedan 316.116 KM, a finansiraju ga Općina Stari Grad i Grad Sarajevo u jednakim omjerima.

## Saradnja u interesu građana

Samo saradnjom i radom u interesu građana mi zaista idemo naprijed - poručili su načelnik Hadžibajrić i gradonačelnica Karić prilikom potpisivanja sporazuma.

„Istakao bih izuzetno dobru saradnju sa gradonačelnicom koja je pokazala dobru volju i interes da zajedno realizujemo projekte kojih će u budućnosti biti još. Zajedno radimo projekat sanacije puta od Darive do Kozije ćuprije koji uključuje i plato na Darivi i prilazni put, a zajedno smo sanirali i dio Bistričkog potoka,“ izjavio je načelnik Hadžibajrić. „Jedan od projekata koje ćemo zajedno raditi je i uređenje korita Miljacke od Bentbaše do mosta na Drveniji, a imamo u planu i druge projekte o kojima je još rano govoriti,“ dodao je. „Što se tiče Darive, moram istaći da smo posljednjih godina uložili oko 400.000 KM u ovaj dio i da je na kompletnoj dionici od Bentbaše do Kozije ćuprije uvedena LED rasvjeta. Igralište na kojem se nalazimo sagradili smo sa Ambasadom Švedske u BiH 2019. godine i koštalo je 180.000 KM, a još 30.000 KM uloženo je u video nadzor,“

### Radovi počeli sa Darive

Radovi na ovom projektu počeli su u ponedjeljak, 04. oktobra ove godine i to iz pravca Darive. Uklanja se oštećeni asfalt, nakon čega će uslijediti tamponiranje i priprema za novo asfaltiranje.



*Mašine na terenu*

kazao je načelnik Hadžibajrić koji je još jednom podsjetio da u pojasu 100 metara od rijeke Miljacke nije dozvoljena nikakva gradnja, ali da se razmatra mogućnost postavljanja privremenih objekata čime bi se ubuduće obogatila ponuda na ovoj lokaciji.

## Projekat koji je javno dobro

Gradonačelnica Karić podsjetila je kako je od početka mandata isticala da je izuzetno važno da Grad Sarajevo saraduje sa gradskim općinama.

„Kada sam rekla da ću saradivati sa općinskim načelnicima od prvog dana imam veliku podršku načelnika Ibrahima Hadžibajrića. I prvi projekat na kojem saraduju Grad Sarajevo i jedna od četiri gradske općine je ovaj sa Općinom Stari Grad. Zadovoljstvo mi je što smo danas potpisali zajednički sporazum o rekonstrukciji dijela saobraćajnice od Darive do Kozije ćuprije“, istakla je

gradonačelnica Karić, te dodala: „Ovo je projekat koji je od izuzetnog značaja, koji je javno dobro i koji će sigurno sam koristiti svim našim građanima, našoj djeci ali i turistima koji će sigurno vrlo rado prošetati ovim dijelom i uživati u našim ljepotama. Iskreno se nadam da ćemo načelnik Hadžibajrić i ja i u budućnosti imati još sličnih zajedničkih projekata“.

## Uklanjanje asfalta i čišćenje jaraka

Projekat uključuje sanaciju dionice u dužini od oko 1600 metara. Riječ je o kraku ulice Dariva (prilazni put Darivi), plato (parking), te saobraćajnici od mosta na Darivi do mosta Kozja ćuprija. Radit će se uklanjanje oštećenog asfalta, mašinsko čišćenje odvodnih jaraka, ugradnja novih šaftova itd. Nakon toga, planirano je navlačenje tamponskog materijala, ravnanje, te postavljanje zaštitnog habajućeg sloja asfalta.

### Obilazak dionice

Nakon potpisivanja sporazuma o saradnji na projektu, općinski načelnik mr Ibrahim Hadžibajrić, gradonačelnica Sarajeva Benjamina Karić, predsjedavajući Općinskog vijeća dr. sci. Mirza Batalović, pomoćnici načelnika Adis Hadžović, Selma Velić i Almedina Porča, te ostali gosti obišli su dionicu koja će se sanirati.



Obilazak lokacije koja će se sanirati

## Uvedena javna rasvjeta od Darive do Kozije ćuprije

Realizovan je projekat uvođenja sistema javne rasvjete od Darive do Kozije ćuprije, a u toku je procedura tehničkog prijema, nakon čega će rasvjeta biti puštena u rad.

Općinski načelnik mr Ibrahim Hadžibajrić, u pratnji pomoćnice za lokalni razvoj Selme Velić i šefa gradilišta Zorana Zamiša obiшаo je radove po završetku projekta.

“U pravoj fazi radova, prije tri godine, postavili smo LED rasvjetu na 34 stuba, a sada je završena i dionica od Darive do Kozije ćuprije gdje je postavljeno novih 58 stubova sa LED rasvjetom,” pojasnio je načelnik Hadžibajrić dodavši da su projekat koji je koštao oko 125.000 KM finansirali Vlada FBiH, JU “Zaštićena prirodna područja KS i Općina Stari Grad. “Nakon tehničkog prijema i priključenja rasvjete, prvi put ćemo imati osvijetljenu kompletnu dionicu od Bentbaše do Kozije ćuprije,” dodao je.

## Omiljeno mjesto za odmor i relaksaciju mnogih građana

Krajni cilj ove lokalne samouprave, predvođene načelnikom Ibrahimom Hadžibajrićem je omogućiti građanima, ali i gostima grada, da u neposrednoj blizini gradske jezgre, imaju uređeno i omiljeno mjesto za odmor i relaksaciju. S tim ciljem je prije dvije godine na Darivi sagrađen i Park prijateljstva na površini od 1.200m<sup>2</sup>, kao poklon Ambasade Švedske u BiH. Park ima ljučjačke, tobogane, njihalice, kule za penjanje, sprave za djecu sa posebnim potrebama, fitness sprave, klupe za odmor. Park prijateljstva je projekat koji je koštao 180.000 KM i vrlo brzo postao je nezaobilazno mjesto okupljanja porodica sa djecom, ali i svih drugih generacija.



Novih 58 stubova LED rasvjete



Hadžibajrić i Zamiš tokom obilaska lokacije

Saradnja sa SFF-om

# Stari Grad dobio zvaničnu festivalsku lokaciju: Ljetno kino na višenamjenskom trgu

Najbolji filmovi u neposrednoj blizini Vijećnice • Višenamjenski trg posjetili oskarovci, glumci, sportisti • Nova dimenzija i doživljaj filmskog festivala



Ljetno kino Stari Grad na višenamjenskom trgu preko puta Vijećnice

**V**išenamjenski trg u ulici Avdage Šahinagića postao je prva starogradska zvanična festivalska lokacija u okviru najveće filmske smotre – Sarajevo Film Festivala. Ljetno kino Stari Grad – okviru SFF-a, održano je od 13. do 20. augusta ove godine, a posjetile su ga stotine građana i ljubitelja filma. Publika je uživala u sadržajima 27. SFF-a i to na najprestižnijoj lokaciji, u samoj starogradskoj jezgri i neposrednoj blizini brojnih kulturno-historijskih znamenitosti.

## Mjesto koje je nedostajalo Sarajevu

Kino je otvoreno premijerom filma “Deset u pola” bh reditelja i oskarov-

### Posebno zadovoljstvo

“Ove godine posebno zadovoljstvo mi je bilo što sam otvaranje SFF-a gledao u kinu Stari Grad. Taj osjećaj da ste na projekciji filma, a ispred vas Vijećnica, simbol Sarajeva, kulture i otpora je neprocjenjiv. Sa ovim kinom Sarajevo je sigurno dobilo najljepši prostor za filmske projekcije. Osim što treba čestitati organizatorima SFF-a treba čestitati i Općini Stari Grad, načelniku i svima koji su doprinijeli otvaranju Open aira u ovom dijelu grada,” poručio je pomoćnik ministra zdravstva FBiH Goran Čerkez.

ca Danisa Tanovića, kojoj je prisustvovao i općinski načelnik mr Ibrahim Hadžibajrić, sa gostima. Kako je izjavio,

kao načelnika najstarije, ali i najljepše općine, uvijek ga raduju događaji poput ovih koji privlače veliki broj turista u našu općinu i omogućavaju razvoj privrede i ekonomije. “Mi smo stvarno puno uradili kada je u pitanju ovaj Trg i podzemna garaža jer ovo je nedostajalo Sarajevu, mjesto na kojem ćemo održavati ovako spektakularne događaje. Što se tiče Sarajevo Film Festivala, to je nešto što bi sigurno mnoge države u regiji i šire poželjele da imaju i možda su čak i malo pozitivno ljubomorni na nas,” izjavio je načelnik Hadžibajrić.

Među njegovim gostima bio je i vijećnik u OV Stari Grad i Gradu Sarajevo Seid Škaljić. “Svi smo jedva dočekali ponovo da izađemo na Sarajevo Film Festival poslije godinu pauze i to ovdje kod nas u Starom Gradu, na Trgu. Mislim da je od velikog značaja što u Starom

## SFF u novom ambijentu

Projekcijama filmova prethodilo je zvanično potpisivanje sporazuma o saradnji između općinskog načelnika Ibrahima Hadžibajrića i direktora SFF-a Mirsada Purivatre koji je tom prilikom kazao: “Zanimljivo da ćemo ovdje predstavljati goste koji će nam dolaziti u Sarajevo. U jednom novom ambijentu predstavljamo Sarajevo Film Festival, na isti način kako će biti predstavljen na drugim lokacijama. Vjerujem da će lokalna sredina, stanovnici Starog Grada, ali i brojni turisti doći na ovaj fascinantni prizor, gdje imamo veliku sliku, ali isto tako pozadinu koja pokazuje ono najljepše što grad Sarajevo ima,” poručio je Purivatra.



*Sa potpisivanja sporazuma*

Gradu postoji jedno ovakvo mjesto. Osim toga, ovdje sada uvijek možete vidjeti nasmijanu djecu koja se igraju i sretno ljude,” poručio je vijećnik Škaljić.

Sa njim se složio i Haris Selmanović vijećnik u OV Novo Sarajevo. “Ovo je prvi put da imamo jedan ovakav vise-mamjenski trg u općini Stari Grad i da je organizivana promocija Sarajevo Film Festivala. Čast mi je prisustvovati, čast mi je što se ovo sve ovako dešava u našem gradu Sarajevu i moram vam reći ono što uvijek ponavljam daje nam djela, nemojte nam davati samo riječi, a večeras sve ovo što vidimo je primjer jednog velikog rada našeg načelnika,” poručio je Selmanović.

## Ljetno kino ugostilo oskarovce, glumce, sportiste

Ljetno kino Stari Grad ugostilo je oskarovca i dobitnika Počasnog Srca Sarajeva reditelja Wima Wendersa, zatim oskarovca Danisa Tanovića, rediteljku Jasmilu Žbanić, glumca Izudina Bajrovića, glumicu i predsjednicu žirija Takmičarskog programa SFF-a Jasnu Đuričić, reditelja i glumca Dragana Bjelogrića, muzičara i kompozitora Željka Joksimovića, pomoćnika ministra zdrastva FBiH Gorana Čerkeza, folk divu Hanku Paldum, bivšeg fudbalera i trenera Sarajeva Mehmeda Janjoša-Čalu i brojne druge.

Na poziv općinskog načelnika mr



*Načelnik Hadžibajrić sa gostima*



*Pomoćnice načelnika Aldiana Kavazović i Adela Plakalo*



*Ekipe filma "Toma"*



*Čerkez čestitao Općini i načelniku Hadžibajriću*

Ibrahima Hadžibajrića gosti jedne od festivalskih večeri bili su uspješni mladi sportisti i genijalci iz naše Općine, a imali su priliku pogledati igrani film “Quo Vadis, Aida?”, rediteljice Jasmile Žbanić. Ova lokalna zajednica ponosna je na uspjehe svojih mladih talenata. Prisustvom projekciji filma koji govori o genocidu u Srebrenici, mladi ljudi uče o ne tako dalekoj prošlosti i tragedijama koje su doživjeli njihovi sunarodnjaci u vrijeme kada se neki od njih nisu ni rodili. Kaja Topić, mlada reprezentativka u karateu nije se ni rodila u vrijeme kada je nad njenim sunarodnjacima izvršen genocid, ali kaže da veoma dobro zna šta se desilo

u Srebrenici. “Mi smo mlađa generacija i nismo bili ni rođeni kada se to desilo. Bilo je teško gledati film. Vidjeti šta su ti ljudi doživjeli. Ovo je zaista pretužno, ali mi je drago što ste me pozvali da večeras na trgu pogledam film i hvala vam za ovu priliku”, kazala je Kaja.

Višenamjenski trg je svojom površinom najveći u Kantonu Sarajevo i prostire se na skoro 3.000 m<sup>2</sup>, a svojim položajem u najužoj jezgri zaslužuje epitet najljepše i najatraktivnije lokacije. U noćnim satima i pod reflektorima ova lokacija dobila je potpuno drugu dimenziju i pružila neponovljiv doživljaj filmskog festivala.

## Regionalna saradnja

# Regionalna saradnja: Općina Stari Grad bratimila se sa opštinama Čair i Aerodrom iz Skopja

**Općina Stari Grad Sarajevo se bratimila sa dvije makedonske opštine • Stari Grad se povezo sa najstarijom, a zatim i najurbanijom opštinom u Skopju • Buduća saradnja i realizacija zajedničkih projekata**



*Ganiu i Hadžibajrić nakon potpisivanja sporazuma u Opštini Čair*

Općinski načelnik mr Ibrahim Hadžibajrić je u septembru, 2021. godine potpisao sporazume o saradnji i bratimljenju sa dvije makedonske opštine. Riječ je o opštinama Čair i Aerodrom iz Skopja (Republika Sjeverna Makedonija) čime su postavljeni temelji buduće saradnje i razvoja prijateljskih odnosa u mnogim oblastima.

## Stari Grad i Čair su dvije najstarije opštine svojih gradova

Općinski načelnik mr Ibrahim Hadžibajrić i načelnik Opštine Čair Skopje

Visar Ganiu potpisali su Sporazum o saradnji i bratimljenju 22. septembra, 2021. godine.

“Našim bratimljenjem povezali smo dvije najstarije opštine Sarajeva i Skopja koje predstavljaju jezgro iz kojeg su rasli ovi gradovi. Naše bratimljenje neće ostati mrtvo slovo na papiru i razvijat ćemo prijateljske odnose kroz različite infrastrukturne, kulturne, sportske i druge projekte,” najavio je načelnik Hadžibajrić. On je podsjetio da Općina Stari Grad ima potpisane sporazume o bratimljenju sa 24 opštine i grada iz brojnih zemalja sa kojima su dosad realizovani zajednički projekti, te nema sumnje da će se takva praksa nastaviti i sa ovom općinom.

U zvaničnoj delegaciji Općine Stari Grad koja je prisustvovala potpisivanju bio je i predsjedavajući Općinskog vijeća dr. sci Mirza Batalović koji je također izrazio zadovoljstvo zbog početka nove saradnje.

“Izuzetno mi je drago što smo potpisali ovaj sporazum sa opštinom Čair koja je jedina opština izvan BiH, a u regiji, koja je sagrađila spomen-obilježje žrtvama genocida u Srebrenici,” poručio je predsjedavajući Batalović. Inače, prijedlog sporazuma o bratimljenju sa ovom opštinom Općinsko vijeće Stari Grad usvojilo je na 7. sjednici održanoj krajem jula, ove godine.

“Započinjemo priču za koju vjerujemo da će trasirati jednu lijepu buduću saradnju, a posebno na očuvanju naše dvije najznačajnije dragocjenosti-Stare čaršije i Baščaršije jer naša Stara čaršija je druga čaršija na Balkanu po svojim starinama, tradiciji i običajima. Ovim potpisivanjem pokazujemo našu opredjeljenost za nastavak prijateljske saradnje sa BiH, a posebno sa opštinom Stari Grad koja je nama dosta slična,” izjavio je načelnik Opštine Čair Visar Ganiu.



## Bratimljenje sa Opštinom Aerodrom

Dan kasnije potpisan je sporazum o bratimljenju i sa Opštinom Aerodrom u Skopju koja se prostire na površini od 20 kilometara kvadratnih i ima blizu 72.000 stanovnika.

Ulaganja u infrastrukturu, gradnju i obnovu zajednički su imenitelj za Stari Grad i Aerodrom.

Sporazum o saradnji potpisali su općinski načelnik mr Ibrahim Hadžibajrić i šef kabineta Opštine Aerodrom, ujedno zadužen za međunarodnu saradnju, Aleksandar Gjorgievski, a potpisivanju je prisustvovao i ministar lokalne samouprave Zoran Dimitrovski, te predsjednica Savjeta Opštine Aerodrom Ivana Cvetkovska. Cvetkovska je naglasila da će Opština Aerodrom ubuduće raditi na planu aktivne saradnje sa opštinama iz regije koja je za njih značajna s aspekta razmjene iskustava, a posebno su zainteresovani za primjere pozitivnih praksi koji se primjenjuju u Općini Stari Grad.

Načelnik Hadžibajrić je upoznao domaćine sa općinom Stari Grad, projektima koji su realizovani i investiranjima, te saradnjom sa ostalim pobratimskim općinama. "Regionalna saradnja je značajna za naše građane i otvaranje novih mogućnosti saradnje na projektima, kako iz oblasti infrastrukture, tako i kulture, sporta, razmjene znanja, iskustava i drugog. Nastojat ćemo naći zajednička interesovanja i sa Opštinom Aerodrom i raditi na njihovoj realizaciji," izjavio je načelnik Hadžibajrić.



*Sa potpisivanja u Općini Aerodrom*

### Položeno cvijeće na spomenik žrtvama genocida u Srebrenici

Opština Čair sagradila je spomen-obilježje žrtvama genocida u Srebrenici u svom centralnom parku što na najbolji način oslikava njihov senzibilitet prema našem narodu. Načelnik Hadžibajrić i delegacija Općine Stari Grad u pratnji načelnika Visara Ganiu nakon bratimljenja položili su cvijeće i proučili Fatihu upravo na tom spomen obilježju.



*U Općini Čair*



*U Općini Aerodrom*

### Posjeta Skopju povodom bratimljenja

Pored načelnika Hadžibajrića i predsjedavajućeg Batalovića, delegaciju Općine Stari Grad u posjeti Skopju povodom bratimljenja sa ovim opštinama činili su: v.d.općinskog pravobranioca Enes Smajlović, pomoćnica načelnika za obrazovanje, kulturu i sport Lejla Dizdarević, pomoćnica načelnika za odnose s javnošću Almedina Porča, kao i vijećnici Almedin Miladin i Vedran Dodik.



*Delegacija Općine Stari Grad sa domaćinima iz Čaira*

## Općinsko vijeće

### 7. sjednica Općinskog vijeća

Na 7. redovnoj sjednici Općinskog vijeća Stari Grad usvojen je Prijedlog odluke o prokopavanju saobraćajnica čiji je upravitelj Općina Stari Grad Sarajevo, a s ciljem:

sprečavanja prokopavanja novoasfaltiranih saobraćajnica osim u izuzetnim slučajevima, utvrđivanja naknade za prokopavanja koja nisu hitne intervencije, te davanja mnogo širih ovlaštenja nadležnim inspektorima prilikom provođenja nadzora, uključujući i oštre finansijske kazne. Ukoliko pravna lica, vlasnici podzemnih instalacija budu vršili prokope bez odobrenja Općine Stari Grad, ne obavijeste općinsku inspekciju u roku od 24h ili se ne pridržavaju propisanih uslova za prokopavanje, kažnjavat će se novčanom kaznom od 5.000 do 7.000 KM. Isti iznos kazne predviđen je i za izvođača radova na prokopavanju saobraćajnih površina. Fizička lica – građani koji vrše prokopavanja ulica kažnjavat će se novčanom kaznom u iznosu od 1.000 do 2.000 KM.

Osim toga, na sjednici je usvojen Izvještaj o realizaciji Budžeta Općine Stari Grad za period 01-01-30.06.2021. godine. Također je izglasan i Prijedlog o izmjenama i dopunama Pravilnika o stipendiranju nadarenih učenika i studenata.



*Zaštita novoasfaltiranih saobraćajnica u Starom Gradu*

### 8. sjednica Općinskog vijeća

Općinsko vijeće Stari Grad Sarajevo na 08. redovnoj sjednici usvojilo je sve predložene tačke dnevnog reda, a zahvaljujući konstruktivnom radu vijećnika i kvalitetnoj saradnji sa nadležnim službama, sve tačke su razmotrene i usvojene u roku od jednog sata. Sjednica je završena za 90 minuta, uključujući vijećnička pitanja i inicijative.

Na početku sjednice, vijećnici su izglasali odluku o prestanku mandata vijećnika Anesa Krivića (SBB) zbog nespojivosti istovremenog obavljanja dužnosti vijećnika u OV Stari Grad i izvršne dužnosti na koju je imenovan u Vladi FBiH, te odluku o verifikaciji mandata Anesu Kurtanoviću sljedećem kvalificiranom kandidatu sa liste političkog subjekta SBB.

Na sjednici je usvojen prijedlog Pravilnika o stipendiranju djece boračke populacije s ciljem usklađivanja važećeg pravilnika sa Zakonom o dopunskim pitanjima boraca – branitelja BiH, koji je stupio na snagu u aprilu ove godine.

Na kraju sjednice iznesena je inicijativa da se stave van snage odluke o proglašenjima Trebevića i Bentbaše zaštićenim pejzažima imajući u vidu da od donošenja ovih odluka nije bilo nikakvih ulaganja u ova područja, osim onih koje je investirala Općina Stari Grad. Također, istaknuto je da je evidentan razvoj i obogaćivanje turističke ponude Trebevića u dijelu koji pripada manjem entitetu, dok u dijelu koji pripada FBiH, konkretno općini Stari Grad nije moguće realizovati bilo kakve projekte jer ih sporni zakon i odluka onemogućavaju, te bi se već na sljedećoj sjednici ova tačka mogla naći pred vijećnicima.



*Predsjedavajući Batalović, dopredsjedavajući Garibija i rukovodilac Stručne službe Općinskog vijeća Elma Novalija*



*Dobra saradnja vijećnika i općinskih službi*

# Načelnik Hadžibajrić u Srebrenici: Izdvojit ćemo još 50.000 KM pomoći Memorijalnom centru



Delegacija iz Starog Grada u Memorijalnom centru Potočari

Uz poruke da Srebrenica nije samo 11. juli i da se žrtve nikada ne smiju zaboraviti, te da je obaveza živih da ne dozvole da prošlost bude zaboravljena, općinski načelnik mr Ibrahim Hadžibajrić sa saradnicima i nosiocima najviših ratnih priznanja - Zlatnih ljiljana i Zlatnih policijskih znački iz Starog Grada, posjetili su sredinom septembra Memorijalni centar Potočari i odali počast žrtvama genocida. Prethodno su članovi Udruženja najviših ratnih priznanja Stari Grad posjetili mezarja u Bratuncu i Vlasenici gdje su također proučili Fatihu i položili cvijeće.

## I prošle godine izdvojena pomoć za Memorijalni centar

Općina Stari Grad izdvojila je prošle godine 50.000 KM za Memorijalni centar u Potočarima, a u okviru inicijative ko-

joj se pridružilo 40-ak lokalnih zajednica iz FBiH. No, samo su Stari Grad i Grad Tuzla izdvojili po 50.000 KM, dok su iznosi ostalih općina i gradova bili manji. Načelnik Hadžibajrić najavio je prilikom posjete da će Općina Stari Grad do kraja ove godine izdvojiti još 50.000 KM za podršku Muzeju genocida u Potočarima. Inače, tu inicijativu iznio je na 7. sjednici



Potočari, mjesto sjećanja i opomene

Općinskog vijeća predsjedavajući dr.sci. Mirza Batalović.

## Podrška u svakom pogledu

Delegaciju je u Memorijalnom centru dočekaao predsjednik Upravnog odbora Šefket Hafizović koji je istakao značaj ovakvih posjeta, kao i finansijske podrške.

“Neprocjenjiva je vrijednost ove posjete delegacije Općine Stari Grad na čelu sa načelnikom Hadžibajrićem, koji je zapravo u kontinuitetu pristuan ovdje kao podrška u svakom pogledu. Oni svake godine za Memorijalni centar izdvoje po 50.000 KM, a da ne govorim o ostalim projektima u Općini Srebrenica i pomoći povratnicima Bošnjacima. Ovo je izuzetno važno jer je ovo samoinicijativni pristup očuvanju kulture sjećanja na genocid nad Bošnjacima Sreberenice i Podrinja i to je nešto što treba biti konstanta svih nivoa vlasti,” poručio je Hafizović.

## Projekti

# Otvoren prvi punkt Hitne pomoći u Starom Gradu

**Općina osigurala prostorije za rad • Građanima na raspolaganju 24 sata • Punkt ima prilaz iz ulice Tekija čikma i ulice Obala Kulina bana 24**



*Sa otvaranja punkta Hitne pomoći na ulazu iz ulice Tekija čikma*

**U** općini Stari Grad otvoren je prvi punkt Hitne medicinske pomoći koji je na raspolaganju građanima 24 sata, a nalazi se u neposrednoj blizini zgrade Općine Stari Grad, te ima osiguran ulaz iz ulice Tekija čikma, kao i iz ulice Obala Kulina bana 24.

Punkt djeluje tako što se i dalje pozivi Hitnoj pomoći upućuju u jedinstveni dispečerski centar (124), odakle se prosljeđuju prema ekipi u ovom punktu, te se tako postiže da hitna mnogo brže dolazi na intervenciju po pozivu građana iz ove općine. Ovo je periferni punkt medicinsko-terenskih ekipa koje su većinom na terenu, ali istovremeno prima i sve pacijente koji im se obrate direktno u punktu.

## Na raspolaganju vozilo sa najsavremenijom opremom

Prostorije za otvaranje punkta obezbijedila je Općina Stari Grad koja je izdvojila skoro 20.000 KM za njihovu adap-

taciju, dok je opremanje izvršio Zavod za hitnu medicinsku pomoć KS. Kako je istakao načelnik Hadžibajrić, odavno je postojala ideja da se ovakav punkt otvori u Starom Gradu, ali nije bilo političke volje i spremnosti za njenu realizaciju. "Ovo je vrlo značajno za naše građane. Imajući u vidu gužve u saobraćaju i udaljenost zdravstvenih ustanova, veoma je važno da otvaramo ovakve punktove jer kada se radi o spašavanju ljudskih života i sekunde mogu biti presudne. Drago mi je što smo otvorili ovaj punkt i što će našim građanima uvijek biti na raspolaganju i vozilo hitne pomoći sa najsavremenijom opremom i medicinski tim koji će im ukazati pomoć," izjavio je načelnik Hadžibajrić.

## Mogućnost brže intervencije na mjestu incidenta

Otvaranju je prisustvovao i ministar zdravstva KS Haris Vranić koji je istakao da je ovo veoma značajan korak u povezivanju lokalne zajednice sa sistemom zdravstva. „Zahvaljujem



*Punkt radi 24 sata*



*Pomoć na licu mjesta*



*U prostorijama punkta*

se načelniku Hadžibajriću koji je to prepoznao i uključio se među prvim načelnicima i dao svoj lični doprinos u otvaranju jednog dijela zdravstvene zaštite," istakao je ministar Vranić.

"Otvaranjem ovakvih punktova stvaramo mogućnost brže intervencije na mjestu samog incidenta. Uzimajući u obzir broj stanovnika i veliki broj privrednih subjekata, te veliki broj turista u Starom Gradu, ovo je zaista odličan potez i mislim da će svi imati koristi od hitne medicinske pomoći u ovim prostorijama," izjavila je dr Bašić Živadinović. v.d. direktorice Zavoda za hitnu medicinsku pomoć.

# U toku su infrastrukturni projekti vrijedni više od 1,5 miliona KM

**U** općini Stari Grad u toku je realizacija značajnih infrastrukturnih projekata čija ukupna vrijednost prelazi 1,5 miliona konvertibilnih maraka. Donosimo pregled aktuelnih projekata.

## Hamdije Kreševljakovića

Još traju radovi na rekonstrukciji ulice Hamdije Kreševljakovića i to na dionici od Bakr-babine džamije do Austrijskog trga. Prva faza projekta uključivala je dionicu od Srednje škole poljoprivrede, prehrane, veterine i uslužnih djelatnosti do raskrsnice kod Bakr-babine džamije. Na ovoj dionici izvršena je zamjena oborinske kanalizacije, asfaltirani trotoari sa obje strane, te nanesen prvi sloj asfalta na dijelu ulice od oko 300 metara. Nakon toga, radovi su nastavljani kroz drugu fazu, na dijelu od skretanja u ulicu Isa-bega Ishakovića (kod Bakr-babine džamije) do skretanja za Austrijski trg, ukupne dužine od oko 120 metara. I na ovom dijelu su izvedeni svi planirani radovi i nanesen prvi sloj asfalta.

Kao neočekivani problem na projektu pojavilo se oštećenje armirano-betonske stropne ploče na zacičevljenom dijelu Bistričkog potoka na okretnici Trg Austrije, usljed čega je obustavljen trolejbuski saobraćaj. Ovaj problem je djelimično riješen, a u saradnji Općine Stari Grad Sarajevo - kao nadležnog upravitelja ceste i Grada Sarajevo - koji je nadležan za upravljanje zasvođenim zacičevljenim potocima. U toku su radovi na sanaciji preostalog dijela ploče.

Inače, rekonstrukcija saobraćajnice Hamdije Kreševljakovića zajednički je projekat Općine Stari Grad i Ministarstva saobraćaja KS, putem Direkcije za ceste KS. Projekat obuhvata dionicu od Drvenije do Austrijskog trga, ukupne dužine oko 450 metara, kao i trolejbusku okretnicu dužine cca 200 metara, a njegova vrijednost je oko 750.000 KM. Općina Stari Grad u ovom projektu finansira ugradnju nove oborinske kanalizacije



*Bjelavica*



*Ploča*



*Hamdije Kreševljakovića*

mreže vrijednu oko 90.000 KM, a sada i sufinansira sanaciju kvara, dok ostale radove finansira Ministarstvo saobraćaja KS.

## Bjelavica

U mjesnoj zajednici Toka-Džeka, koja spada u mjesne zajednice sa izuzetno strmim i uskim ulicama, u toku je sanacija ulice Bjelavica. Ulica Bjelavica je iznimno frekventna ulica jer povezuje više padinskih ulica kao što su: Toka, Bistrik, Krka... Kako su potvrdili iz mjesne zajednice Toka-Džeka, građani su u više navrata iznosili inicijative za sanaciju ove ulice koja je dijelom kaldrmisana, a dijelom asfaltirana. Na osnovu njihovih zahtjeva, općinski načelnik mr Ibrahim Hadžibajrić, putem nadležne službe, uvrstio je ovu ulicu u ovogodišnji plan i program rada. Značajno je što će se sanacijom ove ulice postići rasterećenje saobraćaja kroz ulicu Toka, koja je jedina ulica kojom se neometano odvija

saobraćaj za većinski dio naselja. Sanacija ulice Bjelavica radi se u dužini od oko 115 metara. Investitor je Općina Stari Grad sa oko 34.500 KM.

## Ploča

Nastavljeni su radovi na sanaciji kaldrme na trotoarima na lijevoj strani ulica Kovači i Ploča, u mjesnoj zajednici Kovači. Sanacija je prvo urađena na dijelu ulice Kovači od broja 33 do broja 59, ukupne dužine 170 metara, a radilo se kroz dvije faze. Sada su radovi nastavljani u ulici Ploča (lijeva strana), kod brojeva 21, 23 i 25 – do skretanja u ulicu Saburina, u dužini od oko 80 metara. Projektom se radi djelimična sanacija kaldrmisanih trotoara, tačnije ručno uklanjanje stare kaldrme, izgradnja betonske podloge na koju se ugrađuje postojeći neoštećeni kamen, kao i novi na mjestima gdje je nedostajao. Ukupna cijena svih radova je 35.000 KM, a finansiraju se iz budžeta Općine Stari Grad.

## Infrastruktura

# Nastavljena sanacija važnih saobraćajnica

Za projekte sanacije ulica u protekla tri mjeseca izdvojeno je oko 200.000 konvertibilnih maraka. Novi asfalt postavljen je u ulicama: Za beglukom, Nadmejdani i Kečina, a uređen je i makadamski put Ravne na Trebeviću.

## Nadmejdani i Za beglukom

Ulica Nadmejdani u potpunosti je sanirana uklanjanjem stare kocke i postavljanjem novog sloja asfalta. Inicijativu za ove radove dali su stanovnici ovog naselja na Zborovima građana kao i na Prijemima građana na otvorenom. Ukupno 120 metara ulice je asfaltirano nakon čega su radovi nastavljeni u donjem dijelu ulice Za beglukom koja se nadovezuje na ulicu Nadmejdani. I u ovoj ulici je uklonjena stara kocka, na dionici dužine 120 metara, i izvršeno asfaltiranje. U obje ulice urađeno je i postavljanje novih ivičnjaka na trotoarima sa obje strane. Nadmejdani i Za beglukom su padinske ulice koje su od velikog značaja za putnu komunikaciju stanovnika nekoliko okolnih naselja. Sada kada su ulice sanirane i asfaltirane, građani će imati bolje uslove za odvijanje saobraćaja i kretanje pješaka. Vrijednost radova u obje ulice je oko 100.000 KM.

## Kečina

Izvršena je sanacija dijela ulice Kečina, u mjesnoj zajednici Logavina, na ukupnoj dužini od 235 metara. Radovi su uključivali ugradnju novih kanalizacionih cijevi na dužini od 40 metara, postavljanje 18 šaftova, dva hidranta, te slivne rešetke. Podzemne instalacije zamijenio je i BH Telecom, a nakon svih tih radova pristupilo se finalnom asfaltiranju.

Tokom radova razgovarali smo sa nekim od stanovnika ulice Kečina koji su kazali da će im sanacija ulice znatno olakšati uslove života. Jedan od njih je i Ibrahim Kadrić:

„Ulica je bila poprilično loša, ovo je nešto najbolje za nas građane koji živimo ovdje. Bio je loš i dotrajao asfalt, zimi je bilo klizavo, tako da će nam sigurno biti puno ljepše i lakše kada se završe radovi.“

Projekat je koštao 78.200 KM i finansiran je iz budžeta Općine Stari Grad, a samo je jedan u nizu infrastrukturnih projekata pokrenutih ove godine.

## Makadamski put Ravne

Općina Stari Grad finansirala je sanaciju makadamskog puta Ravne koji vodi prema Planinarskom domu Trebević, kao i sanaciju ograde oko pomenutog doma.

Sanacija se uradila kako bi se omogućio lakši pristup izletištu i Planinarskom domu Trebević, ali i dodatno popularizirao ovaj lokalitet. Prethodno stanje makadamskog puta je bilo izuzet-

no loše i vrlo teško za saobraćanje motornih vozila. Izvršeno je krčenje grmlja, rastinja i granja, čišćenje putnog pravca, te postavljanje tamponskog sloja na najoštećenijim dijelovima puta. Također, projekat je obuhvatao izradu i postavljanje nove drvene ograde oko Planinarskog doma Trebević ukupne dužine oko 80 metara. Za ove radove Općina je izdvojila oko 5.000 KM.



Nadmejdani



Za beglukom



Kečina



Makadamski put Ravne

# Izgradnjom potpornih zidova otklonjena opasnost od rušenja u više ulica

Realizovano je više inicijativa naših građana iznesenih na zborovima mjesnih zajednica, te putem Savjeta mjesnih zajednica, a koje su se odnosile na izgradnju potpornih zidova. Riječ je o osiguranju saobraćajnica i padina od mogućeg obrušavanja u ulicama Grličića brdo od broja 61 do broja 65, Iza bašče broj 10 i Jarčedoli br 40. Za te radove izdvojeno je više od 91.000 konvertibilnih maraka.

## Grličića brdo

Da bi se osigurao putni pravac od daljeg propadanja izgrađen je novi betonski potporni zid s donje strane ulice Grličića brdo s dodatnim ojačanjima, dužine 65 metara. Zid prati postojeći trup ceste i na njega je postavljena zaštitna ograda cijelom dužinom. Istovremeno, radi zaštite padine izgrađen je potporni zid i s gornje strane ulice, ukupne dužine oko 17 metara i visine 1,25 metara. Pored betonskih zidova koji su izgrađeni s donje i gornje strane ulice veoma je važno što je u sklopu projekta urađena i drenaža koja je spojena na postojeću separatnu kanalizacionu mrežu. Projekat se u cjelosti finansirao iz budžeta Općine Stari Grad Sarajevo sa oko 62.000 KM.

## Iza bašče

Izgrađen je potporni zid i u ulici Iza bašče broj 10, na Mahmutovcu. S obzirom da je fizičko stanje zida predstavljalo opasnost za okolne objekte, te pješake i vozila općinski načelnik mr Ibrahim Hadžibajrić dao je nalog da se izvrši izgradnja novog armirano-betonskog zida cijelom dužinom od 12 metara. Projekat izgradnje novog zida finansiran je iz budžeta Općine Stari Grad iznosom od 13.500 KM.

## Jarčedoli

Novi armirano-betonski potporni zid dužine 12 metara izgrađen je u ulici Jarčedoli broj 40 u mjesnoj zajednici Hrid-Jarčedoli. Ovaj projekat je realizovan zbog prijetnje od obrušavanja starog zida na vrlo prometnu saobraćajnicu, koja povezuje ovu starogradsku mjesnu zajednicu sa drugim dijelovima općine. Projekat je finansiran iz budžeta Općine Stari Grad iznosom oko 16.000 KM.



*Grličića brdo - izgrađeni zidovi s obje strane ulice*



*Iza bašče - sagrađen zid dug 12 metara*



*Jarčedoli - zaustavljeno obrušavanje na ulicu*

## Podrška institucijama



# Kontinuirana podrška vjerskim institucijama i kulturno-historijskim spomenicima

**O**pćina Stari Grad, predvođena općinskim načelnikom mr Ibrahimom Hadžibajrićem, svake godine izdvaja značajna finansijska sredstva za nesmetan rad i funkcionisanje vjerskih institucija i kulturno-historijskih spomenika. Iz budžeta Općine Stari Grad je u 2021. godini za vjerske ustanove i institucije izdvojeno oko 130.000 konvertibilnih maraka.

## Obnova fasade Vrhbosanskog bogoslovnog sjemeništa

Načelnik Hadžibajrić potpisao je ugovor sa rektorom Vrhbosanskog bogoslovnog sjemeništa Zdenkom Spajićem

za sufinansiranje sanacije zapadnog dijela fasade ove institucije za šta je iz budžeta Općine Stari Grad za 2021. godinu izdvojeno 42.000 konvertibilnih maraka. Riječ je o veoma zahtjevnom projektu, kako finansijski tako i tehnički jer se na fasadi nalazi puno detalja. „Završavamo zapadnu stranu koja nije najveća, ali je bila najoštećenija. Sve je urađeno veoma kvalitetno, tako da je velika razlika kada pogledate obnovljeni dio i prednji, neobnovljeni dio. Ovaj posao smo priveli kraju zahvaljujući donatorima, među kojima je i Općina Stari Grad i veoma smo zahvalni općinskom načelniku na tome”, kazao je rektor Spajić. Objekat na kojem se izvode radovi proglašen je nacionalnim spomenikom BiH, te se podrškom ovoj rekonstrukciji nastavlja i zaštita kulturno-historijskih spomenika u najstarijoj općini.

## Sanacija stepeništa za zvonik Crkve Svetog Ante na Bistriku

Iz budžeta Općine Stari Grad finansirana je sanacija stepeništa koje vodi do zvonika Crkve Svetog Ante na Bistriku u ulici Franjevačka. Prema riječima gvardijana Franjevačkog samostana i Crkve Svetog Ante fra Stipana Radića, ovo su prvi radovi ikad na crkvenom zvoniku, koji je dovršen 1913. godine, a od tada se na njemu ništa nije radilo.

“Na veliku sreću po nas i ovaj vjerski kompleks, načelnik Hadžibajrić bez imalo odlaganja je odlučio pomoći nam i uplatiti finansijsku pomoć u iznosu od 30.000 KM, za šta smo mu neizmjereno zahvalni“, izjavio je fra Stipan Radić.



Projekat je trajao od početka maja do polovine jula.

## Dugogodišnja podrška radu Fonda Memorijala KS

Općina Stari Grad svake godine izdava finansijska sredstva za nesmetan rad i funkcionisanje Javne ustanove Fond Memorijala Kantona Sarajevo. Od 2009. godine do danas ta podrška iznosi više od pola miliona maraka, a u ovogodišnjem budžetu planirana su sredstva u iznosu od 25.000 KM od čega je veći dio već uplaćen.

Ova izuzetno značajna institucija ima svoje sjedište u Starom Gradu, u ulici Širokac na Kovačima. Osnovana je 1997. godine od strane Skupštine Kantona Sarajevo kao Fond Kantona Sarajevo za izgradnju, a kasnije i očuvanje i održavanje grobalja šehida i poginulih boraca, memorijalnih centara i spomenobilježja žrtava genocida. Sredstva koja izdava Općina Stari Grad usmjeravaju se u sanaciju i održavanje mezarja. Prethodnih godina izvršena je sanacija ograde na mezarju u ulici Vrbanjuša, te postavljena nova ograda na mezarju u ulici Nalina. Također, uz Šehidsko mezarje Kovači urađena je kompletna sanacija kaldrmisanog trotoara.

## Sufinansiranje sanacije fasade Lubine džamije

Lubina džamija, jedna od najstarijih u Sarajevu, pretrpjela je velike štete i devastaciju tokom agresije na našu zemlju, a potpuno je renovirana 1997. godine. Međutim, od tada je prošlo dosta vremena te su na džamiji nastupila nova oštećenja. Polovinom prošle godine počeli su veći radovi na renoviranju i adaptaciji, a projekat obuhvata unutarnje i vanjske radove. „Imali smo dosta problema sa opadanjem dijelova fasade, usljed toga je dolazilo do pucanja zidova u unutrašnjosti džamije, te pojave vlage. Zahvaljujući donaciji Općine Stari Grad i načelnika Hadžibajrića u iznosu od 4.000 KM, te probleme smo riješili“, izjavio je efendija Salih Meštrovac.



*Za projekte Fonda više od pola miliona KM*



*Sanacija unutrašnjosti Lubine džamije*



*Novo stepenište za zvonik Crkve Svetog Ante*

## Startup-i



## Devet korisnika iz Starog Grada dobilo poticajna sredstva

**S**tudio za rehabilitaciju i psihološku podršku, industrijski dizajn, prodaja tradicionalnih bosanskih slastica, proizvodnja sokova od voća i povrća, izrada fotografija na kanvas platnu, samo su neki od poslovnih planova mladih ljudi iz Starog Grada koji će, zahvaljujući podršci njihove lokalne zajednice, biti pokrenuti u ovoj općini. Biti uz mlade ljude koji žele svoje poslovanje i budućnost vezati uz svoju općinu i razvijati uspješne biznise jedan je od prioriteta u djelovanju Općine Stari Grad predvođene općinskim načelnikom mr Ibrahimom Hadžibajrićem.

### Poticaj novim idejama u ukupnom iznosu od 65.000 KM

Uz čestitke na poslovnim idejama i hrabrosti da se okušaju u poslovnim vodama načelnik Hadžibajrić potpisao je ugovore o finansiranju/sufinansiranju poslovnih ideja devet korisnika iz Starog Grada.

“U proteklih pet godina smo samostalno i u saradnji s partnerima obezbijedili više od tri miliona maraka za pro-

#### Korisnici se zahvalili Općini na podršci

Svi korisnici sredstava izrazili su zahvalnost istakavši da im mnogo znači pomoć Općine Stari Grad i općinskog načelnika, posebno u trenutku kada pokreću biznise, što ih ohrabruje u njihovoj odluci da se znajući da njihova lokalna zajednica stoji uz njih.

Ovim projektom bile su obuhvaćene sve ranjive kategorija stanovništva. Sredstva koja su im odobrena mogu koristiti za troškove pokretanja biznisa kroz finansiranje troškova registracije biznisa, troškove sredstava za rad, zakupa poslovnih prostorija, obrtnih sredstava, naknade za doprinose i ostale troškove.

jekte u oblasti razvoja poduzetništva i smanjenja stope nezaposlenosti,” istakao je načelnik Hadžibajrić i podsjetio da je samo za start-up biznise u posljednjih pet godina iz budžeta izdvojeno 330.000 KM za pomoć 31 mladoj osobi.

“Ove godine imamo devet korisnika sredstava i izdvajamo oko 65.000 KM kako bi im pomogli da pokrenu svoje biznise. To je jedan širok spektar poslovnih ideja koje će realizovati i želim im da uspiju i da u svojim firmama zaposle što više ljudi kako bi se smanjio



Sanja Kulenović pokreće studio za grafički dizajn

broj nezaposlenih i zaustavio odlazak mladih ljudi iz Bosne i Hercegovine,” dodao je.

Korisnici koji su potpisali ugovore izabrani su na osnovu javnog poziva za finansiranje i sufinansiranje najboljih poslovnih planova namijenjenih razvoju preduzetništva i zapošljavanju ranjivih kategorija stanovništva, među kojima su mladi, nezaposlene osobe, žene i osobe s invaliditetom koji je realizovan putem općinske Službe za lokalni razvoj i poslove mjesnih zajednica.

# Nakon duže pauze nastavljena sadnja lipa u Aleji ambasadora

**Dolaskom jeseni nastavljen jedinstveni projekat započet 2002. godine ● Od septembra još šest ambasadora zasadilo lipa ● Do sada 213 ambasadora učestvovalo u projektu**

U sljed pandemije korona virusa, sadnja lipa kroz projekat Aleja ambasadora je skoro obustavljena u prošloj godini jer su zasađene samo dvije lipa i to krajem juna, 2020. Nakon više od godinu dana pauze, početkom septembra ove godine, upriličena je prva svečana ceremonija sadnje. Lipu su tada zasađile ekscelencije Ivana Hlavsová, ambasadorica Republike Češke, Makoto Ito, ambasador Japana i Jan Waltmans, ambasador Kraljevine Nizozemske.

Jedinstvenost ovog projekta u regiji, Evropi, a možda i šire, potrdila je ambasadorica Hlavsová nakon što je zasađila svoje stablo: „Mnogo mi znači i velika mi je čast da sam sadila lipu zajedno sa načelnikom Hadžibajrićem. Želim naglasiti da nisam nigdje u svijetu vidjela ovakvu tradiciju za ambasadore, i to je zaista nešto posebno. Sigurno ću i poslije završetka mog mandata posjetiti Sarajevo i obići lipu jer je ovo jedan poseban način na koji ambasadori ostaju zapamćeni“, izjavila je ambasadorica Hlavsová.

Ambasador Kraljevine Nizozemske Jan Waltmans stablo lipa vidi kao najljepši mogući poklon za njegov dolazak u našu zemlju: „Dobiti stablo u srcu Sarajeva je najljepši poklon na početku mog mandata. Sretan sam što sam preuzeo poziciju ambasadora u BiH, nadamo se da će Bosna i Hercegovina napraviti korake ka provođenju reformi kako bi se približila članstvu u Evropskoj uniji.

## Zasađena „Najevska lipa“ iz Slovenije

Početkom oktobra i druga grupa ambasadora imala je priliku zasađiti lipa: Olav Reinertsen - ambasador Kraljevine Norveške, Damijan Sedar – ambasador Republike Slovenije i Anton Păcurețu – ambasador Rumunije. Ta sadnja lipa bila je specifična po tome što je ambasador Republike Slovenije Damijan Sedar za



*Ambasadori Reinertsen, Păcurețu i Sedar dobili certifikate o sadnji*



*Ekscelencije Ito, Waltmans i Hlavsová sa Hadžibajrićem, Batalovićem i Plakalo*

## Najavljeno još ceremonija sadnje lipa

Općinski načelnik mr Ibrahim Hadžibajrić izrazio je veliko zadovoljstvo zbog nastavka ovog projekta, te najavio organizaciju nastavak ovakvih ceremonija sadnje do kraja jeseni. Trenutno u Aleji ambasadora ima ukupno 213 stabala lipa.



*Batalović i Sedar posadili „Najevsku lipu“*

ovu priliku donio posebnu sadnicu lipa i to iz svoje zemlje. „Zamolio sam Općinu Stari Grad da mi dopusti da zasađim ‘Najevsku lipu’. Ta lipa raste na slovenačko-austrijskoj granici i riječ je o najvećem i najstarijem stablu u Sloveniji, a u toj regiji se rodila moja prabaka. Najevska

lipa ima veliki značaj za sve Slovence, pogotovo ove godine kada smo proslavili 30 godina od proglašenja nezavisnosti. Iz svih tih razloga ovo stablo ima poseban značaj za mene lično i zbog toga se iskreno zahvaljujem Općini Stari Grad na ukazanoj prilici“, kazao je ambasador Sedar.

## Predstavljamo



# Karate klub „Baščaršija“ jedan od najuspješnijih i najmasovnijih karate klubova u BiH

**Bavljenje sportom ima važnu ulogu u odrastanju djece • Karate klub „Baščaršija“ broji oko 200 članova • Djeluju na dvije lokacije**

**P**rije četiri godine osnovan je Karate klub „Baščaršija“ Sarajevo koji djeluje na području općine Stari Grad, a na osnovu dosadašnjih rezultata ovaj Klub je jedan od najuspješnijih i najmasovnijih karate klubova u BiH.

Klub je osnovao Miralem Mandžuka, višestruki osvajač evropskih i svjetskih medalja, selektor pionirske reprezentacije BiH i član Upravnog odbora Karate saveza Kantona Sarajevo. Kako ističe kroz razgovor, KK „Baščaršija“ ne bi nizio ovakve uspjehe bez pomoći Općine Stari Grad Sarajevo koju predvodi općinski načelnik mr Ibrahim Hadžibajrić. „Svi naši uspjesi i rezultati ne bi bili mogući bez podrške Općine Stari Grad Sarajevo na čelu sa načelnikom mr. Ibrahimom Hadžibajrićem, kojem dugujemo posebnu zahvalnost. Veoma smo zahvalni na podršci i razumijevanju, a mi ćemo se truditi da istrajemo u ostvarivanju dobrih rezultata i da budemo još bolji i uspješniji“, poručuje Mandžuka.

## Klub okuplja 200 članova

Klub trenutno broji oko 200 članova, a djeluje i radi na dvije lokacije i to: u OŠ „Saburina“ i Mjesnoj zajednici Vratnik. U sklopu svojih aktivnosti imaju školu karatea i sportski/takmičarski karate podijeljen u sedam grupa koji predvodi stručni trenerski kadar i mladi asistenti, koji su studenti, sudije i reprezentativci BiH. „Klub održava tri do četiri treninga radnim danima i to u večernjim satima, u zavisnosti od nastave u školi. Znači, svaka grupa ima svoj plan i program rada. Vikendom se planiraju pripreme i odlasci na takmičenja“, priča Mandžuka.

Sa Mandžukom smo razgovarali i o značaju ovog sporta za djecu. „Karate je borilačka vještina efikasna za razvoj motoričkih sposobnosti, veoma uspješna u podizanju samopouzdanja, sticanju novih prijatelja, druženja, putovanja,

## Poruka iz KK „Baščaršija“

Poruka svim roditeljima, djeci i omladini je da se bave bilo kojim sportom, jer je to najbolji put da se današnje generacije sačuvaju od poroka koje im se nude. Svjedoci smo da je na ulici i noćnim izlascima sve više ponude za korištenje alkohola, cigareta i opojnih droga. Zato se treba baviti prevencijom i uključiti djecu i omladinu na vrijeme da steknu radne navike, da se druže u zdravoj sredini, samim tim će biti zdraviji, uspješniji u školi, poslušniji roditeljima i korisniji društvenoj zajednici. Djeci je neophodan nadzor i kontrola korištenja mobilnih uređaja. Dakle, uz što više obaveza i razgovora, lakše će se dijete odgojiti i usmjeriti da uz Božiju pomoć bude na pravom putu - poruka je Miralema Mandžuke.



*Miralem Mandžuka osvajač evropskih i svjetskih medalja*



*Osvojene brojne medalje*

takmičenja i ostvarivanja rezultata“ kazao je. Način treninga danas se u svijetu mnogo promijenio, a posebno je naglašen pristup prema djeci: „Sve je fleksibilnije, djeca se u školu karatea upisuju sa 4-5 godina, zato karate počinjemo sa igrom kao bijeli pojas, a završavamo se majstorskim zvanjem - crni pojas. Također je važno napomenuti da se karate može vježbati i u trećoj dobi, kao način održavanja forme, koncentracije i kondicije,“ dodaje Mandžuka.

## Veliki planovi za naredni period

Mandžuka ističe da KK „Baščašija“ ima velike planove u budućnosti, a jedan od prioriteta je proširenje Kluba na još jednu jednu lokaciju na području općine Stari Grad. „Kako bi članovima i iz drugih dijelova općine bilo bliže dolaziti na treninge planiramo se proširiti i na lijevu stranu Miljacke, prema Bistriku. Trenutno pripremamo kandidate za nova



*Mandžuka i Hadžibajrić*



*Sa jednog od treninga*

### Klub je osvojio više od 1000 medalja

Imaju prvake BiH koji su učestvovali na evropskim i svjetskim šampionatima, svjetskim WKF ligama za mlade i na svim takmičenjima ostavili su zapažene rezultate i uspjehe. Najznačajniji rezultati Kluba su višestruke titule prvaka i viceprvaka države i Balkana. Na posljednjem državnom prvenstvu plasirali su se na 4. mjesto kao najuspješniji klub u BiH. U protekle četiri godine Klub je osvojio više od 1000 medalja na domaćim i međunarodnim turnirima. Iznjedrio je više od 20 majstora karatea i reprezentativaca BiH.

učenička i majstorska zvanja, kao i za balkansko i mediteransko prvenstvo“, ističe Mandžuka. Uporedo rade i na priprema za organizaciju dva turnira za narednu godinu. U februaru imaju planiran Četvrti međunarodni turnir ‘Baščašija kup’, te u maju Općinsko prvenstvo povodom Dana Općine Stari Grad.



*Kadetska ekipa*



*Faruk Kadrić - dvostruki prvak u BiH*

## Pobratimske općine

# Grad Kragujevac - nekadašnja prijestonica Srbije

**Stari Grad i Grad Kragujevac bratimili su se 2012. godine • Saradnja kroz sport i obrazovanje • Kragujevac ima svoj Stari Grad**

Općina Stari Grad može se pohvaliti pobratimskim odnosima sa čak 25 općina i gradova iz regije, ali i šire, a među njima je u Grad Kragujevac. Na sjednici Općinskog vijeća Stari Grad održanoj u septembru 2011. godine, prihvaćen je Sporazum o saradnji Općine Stari Grad i Grada Kragujevca, koji je potpisan 21. oktobra 2012. godine.

Sporazum su potpisali načelnik Ibrahim Hadžibajrić i tadašnji gradonačelnik Kragujevca Veroljub Stevanović i tako je počela prijateljska saradnja između ove dvije općine.

Datum potpisivanja ugovora posebno je značajan za Kragujevac, jer se tada obilježava godišnjica stradanja više hiljada nevinih građana, učenika i djece koje su 21. oktobra 1941. godine strijeljali fašistički okupatori.



*Hadžibajrić i Stevanović, potpisivanje Sporazuma o bratimljenju 2012. godine*

## Općina Stari Grad domaćin biciklističkog maratona 'Kragujevac – Mostar'

Saradnja Starog Grada i Kragujevca najviše je bazirana na kulturno—sportskim manifestacijama. Već godinama je Općina Stari Grad domaćin biciklističkom maratonu Kragujevac-Mostar. Inicijator ove manifestacije je biciklistički Paraolimpijski klub "Junior", a organizuje se s ciljem povezivanja sportista zemalja u okruženju. Svake godine učesnici maratona budu gosti Općine Stari Grad, a načelniku Ibrahimu Hadžibajriću je uručena plaketa za kontinuiranu podršku i gostoprimstvo biciklistima i ovoj manifestaciji.



*Kragujevac četvrti grad po veličini u Srbiji*

## Saradnja OŠ „Vrhbosna“ sa Mošćanice i OŠ „Milutin i Draginja Todorović“ iz Kragujevca

Na osnovu Sporazuma o bratimljenju između Općine Stari Grad i Grada Kragujevca ostvarena je i saradnja između dvije osnovne škole ovih bratskih lokalnih samouprava. Saradnja između OŠ „Vrhbosna“ sa Mošćanice i OŠ „Milutin i Draginja Todorović“ iz Kragujevca došla je na inicijativu općinskog načelnika mr Ibrahima Hadžibajrića, koji je predložio saradnju sa pobratimskim Kragujevcem i na polju obrazovanja.

Povodom toga, posebno osnovani tim za prekograničnu saradnju OŠ “Vrhbosna” je bio u posjeti OŠ “Milutin i Draginja Todorović”. Direktorica škole iz Starog Grada, Erzumana Fukelj i direktor škole iz Kragujevca, Dragan Pavlović



*Podrška Biciklističkom maratonu Kragujevac-Mostar*


su potpisali Povelju o saradnji s ciljem da razmijene iskusta u oblasti odgoja i obrazovanja, te upoznavanja tradicije i kulture naših naroda i ostvarivanja interkulturalne saradnje.

## Bogata kulturno-historijska tradicija

Grad Kragujevac četvrti je po veličini grad u Srbiji. Središte je Šumadijskog okruga, a od 1818. do 1842. godine je bio glavni grad Srbije. Ime grada prvi put se pominje 1476. u turskim spisima, koji se danas čuvaju u Arhivu vlade Turske u Istanbulu. U Kragujevcu je osnovano prvo pozorište u Srbiji (1835.), prva gimnazija (1833), prvi univerzitet (tzv. “Licej” - 1836.), prvi sud, apoteka te prvi nogometni klub (“Šumadija” 1903.). Do 1945. godine je bio centar vojne industrije u Srbiji. U bivšoj Jugoslaviji bio je poznat po automobilskoj fabrici Zastava koja je danas u vlasništvu FIAT-a, a poznati su i po kragujevačkom kajmaku.

## Kragujevac ima svoj Stari Grad

Stari Grad Kragujevac je jedna od pet općina Grada Kragujevca i historijsko je sjedište grada. Najpoznatije Kragujevačke građevine se nalaze u u Starom Gradu, uključujući Pozorište Joakim Vujić i Kragujevačku gimnaziju. Općina Stari Grad je kulturni, administrativni, obrazovni, gospodarski i trgovački centar Grada Kragujevca.



Naziv institucije	Telefon
Policija	122
MUP Stari Grad	033/ 532-000
Hitna pomoć	124
Vatrogasci	123
Taxi Sarajevo	1515
Turistički informativni centar	033/ 532-606 i 580-999
Info centar Općine	033/ 233-184
Mjesne zajednice	033/ 265-526
Porezna uprava	033/ 555-481
Apoteka „Baščaršija“	033/ 272-300
Biro Stari Grad	033/ 557-247
Općina Stari Grad Sarajevo	033/ 282-300

Općinska služba	Telefon
Služba kabineta općinskog načelnika	033/282-400
Općinsko vijeće	033/282-313
Služba za odnose s javnošću i informacione sisteme	033/282-491
Služba civilne zaštite	033/282-395
Služba za investicije i komunalne poslove	033/282-417
Služba za urbanizam	033/282-316
Služba za imovinsko-pravne, geodetske poslove i katastar i stambene poslove	033/282-335
Služba za boračko-invalidsku i socijalnu zaštitu	033/282-397
Sektor za tehničke poslove i obezbjeđenje	033/282-452
Služba za opću upravu i inspeksijske poslove	033/282-357
Služba za finansije	033/282-427
Služba za privredu	033/282-359
Općinsko pravobranilaštvo	033/282-371
Služba za obrazovanje, kulturu i sport	033/282-365
Služba za lokalni razvoj i poslove mjesnih zajednica	033/265-525

-  Informacije
-  Policija
-  Parking
-  Prva pomoć
-  Toalet
-  Pošta
-  Banka



In Memoriam  
Tetka Zilha  
01.04.1952. - 01.10.2021.